

**Okwukwo izi
ke Mbom
Pita
gbaru**

Nhne gbasiri okwukwo izi ka

Okwukwo izi ke Mbom Pita gbaru bu ke Pita gbaz-nennu ele Karaṣi naata awnụwhnu kwnornu be neekpenu Nyenwe aṣ. Pita kannu be nu agida ele ke Karaṣi nṳowhnusni anya n'aka ele Rom ele kwége nu Jizṳsi Karaṣi. Be jaazi kṳriri naata awnụwhnu ke kakwo. Kṳvu, Pita naakanu be nu be nwe ndidi kwnornu nu kpakara ele sno Nyenwe aṣ jaata awnụwhnu kwnornu okwnata ovu be. O kaa nu ka jeeme okwnata ovu be si rikne, ke jeenye Nyenwe aṣ igwugwu n'obochi Jizṳsi jaava.

Kṳvu kwnornu nhne Chiokike mernu hite n'ome Karaṣi hi n'enwu lizo, kpakara ele Karaṣi nwernu olile anya. Lele kpa Karaṣi beru osno ta awnụwhnu, omekwo, be nyee a igwugwu, o bu masi kpa nye Karaṣi obula jeenwe igwugwu nga Jizṳsi jaava.

Nhne zi n'okwukwo izi ka

Obekwu ikwu nu okpukpe (1:1,2)

Risi olile anya aṣ (1:3-12)

Owu budnu zi nsṳ lele ele ke Chiokike (1:13---2:17)

Nhne atu awnụwhnu Karaṣi (2:18-25)

Awnụwhnu nye Karaṣi (3:1---4:19)

Ezni ele risi ogbako Chiokike (5:1-11)

Obekwu ikwu ipne-aznụ (5:12-14)

¹ Mawa, Pita, nye izi Jizọsi Karaịsi, naagbaz-nenu ele Chiokike hōhiaru ke gbasarụ kpakara ẹli Pōntosi, Galasia, Kapadosia, Esia nụ Bitinia ọkwukwo izi ka.

² Chiokike Nda mahjaru anụ, gweru aka a hōru anụ, bīta anụ nsọ hite n'Enine Nsọ, ma anụ noobnonu Jizọsi Karaịsi nsnị, ma ọvna a snusnama anụ.

Oru nụ udno banụ anụ aba.

Olile anya ke zị budnu

³ Ọznarni zīnu Chiokike nụ Nda Nyenwe aī Jizọsi Karaịsi, nye hiri nụ obirizi a mūhia aī nū budnu ikne. O mernu Jizọsi Karaịsi hi n'ẹnwu lizo, ke nyernu aī ọkwata ovu zī budnu.

⁴ A bna n'okehja mkpe ke zá noolulu olulu, nū ke be mérula emeru, nū ke zá nọobo ọbo, ke Chiokike bītannu anụ n'oligwe.

⁵ Chiokike jeeji iknernema a bīta anụ tem anụ nahja ọznohia, kwnornu nū anụ tūkwasiri a ovu. O jeeme ka whya iwhe n'ige ipne-aznụ.

⁶ Anụ nọonwudna ọnwudna kītna kwnornu ka, ọ bu n'ezi nū anụ naata awnūwhnu zī ọdo n'ọdo n'ige matī ka.

⁷ Kpakara ọrnarna ka varū ma be tule ọkwata ovu anụ ma anụ zī snam lele kpa be neeji bēkwnu naagba golu ke noolu olulu. Ọ bu kpa be neeji bēkwnu nōotule ọkwata ovu anụ, ma anụ nwehja ọznarni nū igwugwu n'ọbochi be jookpume Jizọsi Karaịsi.

⁸ Nye anụ whnūrnū n'anya, ọ bu n'ezi nū anụ jīle anya anụ lawūru whnū a, anụ kweru nū ya, ọ bu

n'ezì nù anù jíle anya anù lawùru whnù a kítna. Kam kpayarù anù nwernu snarnìma k'agída ke ọnu jòokowali.

⁹ Anù nahiaru nhne anù kwnatarù ovu ke bù ọznohia ke mkpùru ovu anù.

¹⁰ Ka bù ọznohia wam ele ọwhnurninya piosiri rikne, nyosna nhne gbasìri a, be whnùru ọwhnurninya gbasìri nkesi wam Chiokike jeenye anù.

¹¹ Be pioru ọ mahija ige wam nù kpa ọ jòoburu bù nhne Enine Karaìsi ke zì nù rime be kwuru, nhne gbasìri awhnùwhnu Karaìsi jaata nù igwugwu ke jooosno a.

¹² Chiokike kpumennu ele ọwhnurninya ka nù ẹrnu be búo ke be, kọvu ke jaabnanù anù iru, bù ke be kwuru hite n'ọnu ele znirni anù izi ọma, hite nù rikne ke Enine Nsọ ke hiri n'oligwe va. Ka bù nhne ke ele enine izi pioru o lebna anya nù rime a.

Anù zìri nsọ

¹³ Kam kpayarù, anù suru ajnì n'ovu anù, anya dù anù ẹli, anù neele oru ke Jizọsi Karaìsi jeenye anù anya nga be kpumernu a.

¹⁴ Lele rùmu ke noobnonu Chiokike nsni, anù lánna nù rime nhne ojo ke nọogwnu anù nù mbọm nga anù zì lele ele máa nhne.

¹⁵ Tnùnuma, lele kpa nye wam sukwuru anù zì nsọ, anù zìri nsọ nù kpakara nhne anù neeme.

¹⁶ Kwnornu nù be gbarù a n'ọkwukwo nsọ, kaa, “Anù zìri nsọ, lele kpa me zì nsọ.”

¹⁷ Ọ búru nù anù noosukwu Nda ke zá neele badnù anya n'íkpe, bù nye neekpe badnù ọbula

lele kpa ẹnu be jiri zị, anụ ziri bụdnu lele ele izne nọotu ogwnu n'owa ka.

¹⁸ Anụ magwụ nụ ọ bụo golu mọbu siliva ke noolulu olulu bụ nhne be jiri gbahia anụ hite n'aka nhne ojo ke anụ nahiaru n'aka ele nda anụ ọknani,

¹⁹ kọvu ọ bụ ọvnarna Karaịsi ke zị okne ọnu ahia, lele nnwọ atnurnu ke nwée ọru mọbu ntupo.

²⁰ Chiokike hohiaru a tụtụ sụ ọ turu ntụ-eli ọwa. Kọvu o mernu a ọ whuya iwhe n'ọbochi ipne-aznụ ka kwnornu anụ.

²¹ Anụ kweru nụ Chiokike hite nụ ya, nye o mernu ma o hi n'ẹnwu lizo, nyee a igwugwu, ma olile anya anụ nụ ọkwnata ovu ziri nụ Chiokike.

²² Hne anụ bitaru ẹhni anụ snam hite n'obno nsnị n'ezi ọka, nọowhnu ele kweru ekwe n'anya, anụ gweru ọwhnun'anya ke hi n'ovu anụ whuya whnụ ibne anụ n'anya.

²³ Be murnu anụ berere, ọ bụo hite nụ mkpuru ke nooro oro, kọvu hite nụ mkpuru ke zá nooro oro, ke bụ ikwu-ọnu Chiokike ke zị ọkwnukokwnu.

²⁴ Ọkwukwo nsọ kwuru,
 “Kpakara badnụ nụ lele achara,
 igwugwu badnụ nụ lele okoko achara,
 achara chanwụ, okoko a dnahala,
²⁵ kọvu ikwu-ọnu ke Nyenwe aị jaazi
 ọkwnukokwnu.”
 Ka bụ ikwu-ọnu ke izi ọma wam be znirni anụ.

2

¹ Kam kpayarụ, anụ gweme kpakara nhne ojo n'ẹhni anụ, irno, nụ kpakara aghigho, nụ ruwhnu lawuru, nụ okwno-awụwa nụ ọkaja.

² Lele rụmu be mụrnu ikne, akpịri ke mini-rẹma ke zị snam ke enine, ke bụ ikwu-ọnu Chiokike nọokpo anụ bẹkwnu, ma anụ nwọ a, sopiya nụ badnụ dụ ọznohia.

³ Kịtna, anụ raturu a riro whnụ nụ Nyenwe aị bụru ọma.

Akaworugwu zị bụdnu

⁴ Anụ vakwnusi Nyenwe aị lele rugwu ke zị bụdnu ke ele badnụ juru, kọvu ke Chiokike hōhiaru, zị okne ọnu ahia n'anya a.

⁵ Anụwa masi, lele akaworugwu ke zị bụdnu, be jiri anụ wu Oro Nso ke enine, ma anụ bụru ele ọkwa ariohna zị nsọ, ele jaakwa ariohna enine ke Chiokike jaanarnụ hite nụ Jizosi Karaisi.

⁶ Be gbarụ a n'ọkwukwo nsọ, kaa,
 “Le, m bitaru m nụ rime Zayoni,
 akaworugwu nsukala ọro me hōhiaru ke zị
 okne ọnu ahia,
 nye ọbula ke tükwasiri a ovu,
 iwhnerne jọtụ a.”

⁷ Nụ hne anụ ele kweru ekwe zị, akaworugwu ka zị okne ọnu, kọvu hne ele kwé ekwe zị, be gbarụ a n'ọkwukwo nsọ, kaa,
 “Akaworugwu ke ele noowu ọro juru,
 kiyam gholam risi nsukala ọro.”

⁸ Be gba kwno,
 “Akaworugwu ke jeeme badnụ kpọbi ọchi,
 nụ rugwu ke jeeme be dna.”

Be dnarnụ kwnornu nụ be kwége ikwu-ọnu Chiokike, lele kpa echiche Chiokike zinu be.

⁹ Kọvu anụ bụ ele Chiokike jiri aka a hōhia, ele ariohna ke eze, mbam ke zị nsọ, ele ke Chiokike,

ma anụ gesi ọznarni nye wam sukwuru anụ hite nụ rime ọchichiri bna nụ rime iwhe a zị igwugwu.

¹⁰ Nụ mbom anụ bụo ele ke Chiokike, kovu kịtna, anụ bụ ele ke a, ele nwée obirizi nụ mbom, kovu kịtna, Chiokike donnu anụ obirizi.

¹¹ Ele me whnuru n'anya, m naariasno anụ, lele ele izne nụ ele neewhe ewhe n'owa ka, anụ nyée nhne ojo ke nọgwnu anụ, ke nọolu masị ogwnu megidne mkpuru ovu anụ oghere.

¹² Anụ wu bụdnu ke bụru oma n'esilawuru ele máa Chiokike, ọ bụ n'ezị nụ be noobno anụ nhne ojo, kovu be whnụ ọnu oma anụ, ma be znarni Chiokike n'ọbochi o jeelekasi aị.

Bịta ẹhni anụ nụ mkpururu ele ọchichi

¹³ Kwnornu nụ Nyenwe aị, anụ bīta ẹhni anụ nụ mkpururu ọchichi ke badnụ, mọbu eze, lele nye risi,

¹⁴ mọbu ele ọchi ẹli ele o ziyaru ọ ta ele ojo awhnụwhnu, nụ ọ znarni nye neeme nhne oma.

¹⁵ Ka bụ nhne Chiokike noopio, ma anụ hite n'ọnu oma anụ kpusni ọnu ele iwhnirniwhno.

¹⁶ Anụ wu bụdnu lele ele nwernu ẹhni be. Anụ jí ọnodi wam kpusni nhne ojo, kovu anụ ziri bụdnu lele ele izi Chiokike.

¹⁷ Anụ sọ kpakara badnụ anya, anụ whnụ rumu Nda n'anya, anụ tų ogwnu Chiokike, anụ sọbisinu eze.

Awhnụwhnu Karaịsi

¹⁸ Ele ọhi, anụ gweru ọso anya bīta ẹhni anụ nụ mkpururu ele nwe anụ. Anụ ménu nye ovu oma nụ nye udno kpọi, ma nye aka rikne masị.

19 Kwnornu nù Chiokike jògozi anù ọ bụru nù anù tarù awnụwhnu hne ọ zá nhne ojo anù mernu, kọvu kwnornu nù anù tūru ogwnu Chiokike.

20 Ndaa igwugwu ke anù jeenwe, ọ bụru nù anù tarù awnụwhnu kwnornu nù nhne ojo anù mernu? Kọvu anù gwuzogidne n'awnụwhnu hne anù mernu nhne ọma, Chiokike jògozi anù.

21 Ọ bụ nhne be sukwuru anù, Karaisi tarù awnụwhnu nù risi anù, ghasanù anù nhne atù, ma anù snornu rēnu ọchi a.

22 “Ọ zá mmehie o mernu,
ọ zá aghigho be piohīaru n'ọnu a.”

23 Nga be mernu a nhne iwhnerne, o mégnarnuge, nga ọ tarù awnụwhnu, ọ kpála rikne, kọvu o gweru ẹhni a yisi n'aka nye wam neekpe ikpe bụru ọma.

24 Ya n'iwhuru a jiri ẹhni a vuru kpakara mmehie aị n'olu ọgba, ma a bụru ele nwurnu ọnwu ghasa mmehie, ziri bụdnu ele mee mma. O jiri ẹnya a gwọ kpakara ẹhni igbugbu aị.

25 Anù nù lele atnurnu ke whuru apna, kọvu ke hiehnarnu hne Nye Ọznuznu nù Nye Risi mkpuru ovu anù zị.

3

Ele nzi nù nnwerne

1 Kpam masi, anù ele bụ nnwerne, anù bīta ẹhni anù nù mkpururu nzi anù. Ọ bụrubedi nù be bụ ele kwéle ikwu-ọnu Chiokike, be jeenwe rikne hiri nù agwa ọma anù kweru hne anù kwúle ọka,

2 kpa be jọowhnu anù noowu bụdnu bụru ọma ke zị masi snam n'ọso n'anya.

³ Anụ kwé mma anụ bụru nhne ke anya nọowhnu kpọi, ọ bụo kpa anụ kparụ risi anụ, mọbu golu anụ tų n'ehni, mọbu iwo marnụ mma anụ wogwu.

⁴ Kọvu mma anụ bụru agwa ọma wam tugwaru otugwa ke zị nụ rime ovu, ke bụ nhne ẹyi ke zá nooro oro, ke bụ ọzi wọhnerne nụ enine ke udno, ke zị okne ọnu ahia n'anya Chiokike.

⁵ Ọ bụ kpa ele rinya gbaka zị nsọ ele tųkwasiri Chiokike ovu mernu ẹhni be mma, be bítaru ẹhni be nụ mkpururu nzi be.

⁶ Sera nụ kpam, o bnonnu Ebereham nsni, noosukwu a, “Nyenwe m.” Anụ bụ rụmu a rinya, ọ bụru nụ anụ jeeme nhne ọma gharu ọ tų ogwnu nhne ọbula.

⁷ Kpam masi, anụ ele bụ nzi, anụ jiri ọso anya nụ akọ, anụ nụ nnwerne anụ wuru, hne anụ magwu nụ be bụ ele nwée rikne. Anụ nụ be jeekheia nkesi bụdnu kwó okwo Chiokike neekesi anụ n'etekne. Anụ mee kpam, ọ zị nhne ọbula bnosni okpukpe anụ.

*Awghnuwhnu kwnornu
ome nhne bụru ọma*

⁸ N'ipne-aznụ, kpakara anụ nwe otu ovu, anụ donu ibne anụ obirizi, anụ whnụ ibne anụ n'anya lele rụmu nda, anụ nwe obirizi n'ehni ibne anụ, anụ bụru ele be gwednarnụ ẹli.

⁹ Anụ jí nhne ojo kwuhnata nhne ojo, anụ gógwna ngugo, kọvu anụ nọgozi ọgozi, kpa Chiokike suk-wuru anụ ma anụ kehia ngozi masi.

¹⁰ Kwnornu nụ ọkwukwo nsọ kwuru,
“Nye ọbula ke whnurnu bụdnu n'anya,
ke noopio ọbochi ọma,
ọ bíta ọnu a ma ọ gharu o kwu ọka ojo,

bịta masị mgbele-ọnu a n'aghalaghala.

11 Ọ gharu nhne ojo, mee nhne buru oma,
pio udno, gbasno a.

12 Kwnornu nu anya lawuru Nyenwe aị zị n'ehni ele
mee mma,
nsni a nonu okpukpe be,
kovu ruwhnu Nyenwe aị neemegidne ele neeme
nhne ojo.”

13 Nyele jeemejo anu, o buru nu anu gwuzosi
rikne nu nhne oma?

14 Ọ buru nu anu ta awnwhnu kwnornu nu
anu mernu nhne oma, ovu so anu n'onu, ogwnu tu
anu kwnornu be, ovu lakwadia anu mini.

15 Anu sobisinu Karaịsi lele Nyenwe aị nu rime
ovu anu. Anu jiknernu o sa aiji nye obula jaasikwa
anu nhne gbasiri olile anya wam zị n'ovu anu hite
n'oso anya nu ovu zị wohnernerne.

16 Anu bịta ovu anu snam, ma ele nookwu nhne
ojo kwnornu agwa oma anu kweru nu Karaịsi,
iwhnerne jotu be nu nhne ojo be nookwu.

17 Ọ ka mma, o buru nu o bu echiche Chiokike
nu anu taru awnwhnu kwnornu nu anu mernu
nhne oma karu kwnornu nu anu mernu nhne ojo.

18 Karaịsi nwuru otu mgba kwnornu mme-
hie aị, nye ikpe mana nwuru kwnornu ele ikpe
marnu. Karaịsi mernu ka ma o duru anu du hne
Chiokike zị. Ọ nwuru enwu n'anọ-ehni, kovu o zị
budnu n'Enine,

19 nu rime enine zị budnu,* o znernu zni ele
enine ke zị n'oro ikelu izi oma.

20 Ka bu ele za noobno nsni, kpa Chiokike ji
nkasi ovu neese nga Noa notu ogbo ke be jiri

* **3:19** hite nu Enine Nso

znòhia badnu ele nu ele, badnu esato kpòì hite nu mini.

²¹ Ka neegesi nu òwu mini znòhiaru anu, ke bu nòorio Chiokike ovu zì snam hite n'olizò n'enu ke Jizòsi Karaìsi. O búo osnuma rune ke ehni.

²² Karaìsi bu nye larù oligwe dazìri eli n'akarikwnunga Chiokike, hne kpakara ele enine izi nu òchi risi nu rikne zì nu mkpururu a.

4

Owunu Chiokike budnu

¹ Kpam masì, Karaìsi tarù awnùwhnu n'anò-ehni a, anù jiknernu o mee kpam masì, kwnornu nye tarù awnùwhnu n'anò-ehni a zìma neeme mmehie.

² Kam kpayaru, o zá noowu budnu a n'òwa ka lele kpa agwnurnu nhne ojo ke badnu, kovu lele echiche Chiokike.

³ Kwnornu nu ige anù tuwhuru n'ige wheru ewhe noowu budnu lele ele máa Chiokike zulem. Ige wam anù noowu budnu ke zìla rìchna, agwnurnu nhne ojo, onwo manya, okne otne eri, nu okwa renwu.

⁴ Kìtna, o jiri be anya nu anù zá noosno be neeme nhne ojo berere, ke kpayaru be nòovu anù onu.

⁵ Kovu be jaasa ajji gbasìri ehni be nu ruwhnu nye wam jeekpe ele zì budnu nu ele nwurnu onwu ikpe.

⁶ Kam kpayaru, be jiri zni ele nwurnu onwu izi oma nga be zì, ma be kpe ikpe be hite nu nhne be mernu nga be zì budnu lele badnu, ma be zìri budnu n'enine lele Chiokike.

⁷ Mbimambi kpakara nhne zị ndundu. Anụ nwe anya udno, anya dụ anụ ẹli, anụ neekpe okpukpe.

⁸ Ke kakwo, anụ nwe ọwhnun'anya zị omimi n'esilawuru anụ, kwnornu nụ ọwhnun'anya nookpusni agịda mmehie.

⁹ Anụ jí ntamu nabnanya ibne anụ.

¹⁰ Nye ọbula gweru nkesi ọ nahiaru n'aka Chiokike znenu ibne a izi, gweru okwesi ọkwnata ovu neekesi oru Chiokike zị ọdo n'odo.

¹¹ Nye neezni izi ọma, ọ zni a lele nụ ọ bụ ikwu-ọnu ke hi n'ọnu Chiokike whuya. Nye neezne izi, o mee a lele Chiokike nyernu a iknernema, ma be znarni Chiokike nụ rime kpakara nhne hite nụ Jizọsi Karaịsi, nye nwe igwugwu nụ rikne tim tọm. Amim.

*Awhnụwhnu lele
nye Karaịsi*

¹² Ele me whnurnu n'anya, ọ gbagwoji anụ anya kwnornu ọrnurnu zị igbugbu ke naarna anụ lele nụ ọ bụ nhne ikne neeme anụ.

¹³ Kọvu anụ nwudna, kwnornu nụ anụ sno Karaịsi takọ awhnụwhnu, ma anụ nwe ovu ọso n'ọnu zị agịda nga be jookpume igwugwu a.

¹⁴ Ọ bụru nụ be mernu anụ nhne iwhnerne kwnornu nụ rewhna Karaịsi, ovu sọ anụ n'ọnu, ka neegesi nụ Enine igwugwu, ke bụ Enine Chiokike wu nụ rime anụ.

¹⁵ Ọ zá nye ta awhnụwhnu n'esilawuru anụ lele nye gburu badnụ, mọbu nye buznu, mọbu nye mernu nhne ọjọ berere, mọbu nye neelebna anya nụ nhne gbásịla a.

¹⁶ Kọvu, ọ bụru nụ nye ọbula ta awhnụwhnu lele nye Karaịsi, iwhnerne túko nye wam, kọvu o nyee

Chiokike ọznarni kwnornu nụ be nookwu a nye Karaịsi.

¹⁷ Ige valẹm nga be jaapanizo ikpe n'ezi-nụ-oro Chiokike. Ọ bụru be panizo ikpe nụ hne a zị, ndaa kpa ọ jaazinu ele kwéle izi ọma Chiokike?

¹⁸ Ọ bụru nụ ọ jaara ẹhni ọ znọhia ele mee mma, ndaa hne ele máa Chiokike nụ ele mmehie jaazị?

¹⁹ Kam kpayarụ, nye ọbula ke naata awnụwhnu lele kpa echiche Chiokike jiri zị, gweru ovu ọma yisi ẹhni a kpam kpam n'aka Nye Okike nye kwe-siri ọkwnata ovu. Nye wam zne nụ ruwhnu neeme nhne ọma.

5

Ele okno badnụ nụ ele ikoro

¹ M naariasno ele okno badnụ zị n'esilawuru anụ hne me bụ masị nye okno badnụ, m whnuru m awnụwhnu Karaịsi taru, m jeekehia masị igwugwu a nga be jookpume a.

² Anụ znụ aturu Chiokike ke zị nụ mkpururu anụ, neelegidne be anya nụ kpakara ovu anụ kpa Chiokike pioru a, ọ búo nụ mkpa kpagwu anụ, kovu kwnornu nụ ọ bụ nhne kwesiri omume. Anụ rnu ẹrnu anụ, ọ búo kwnornu iru anụ jeenwehia, kovu nụ ọ nhne zị n'ovu anụ n'omume.

³ Anụ mée be lele nụ be bụ nhne ke aka anụ, kovu anụ bụru nhne atụ bé joosno.

⁴ Nga Nye Risi Ọznuznu Aturu varu, anụ jaanahia okpu-eze zị igwugwu ke jaazị noonwu va-a-a tem.

⁵ Kpam masị, rụmu ikoro, anụ b́ta ẹhni anụ nụ mkpururu ele okno badnụ. Kpakara anụ woru ọzi wọhnerne n'ovu lele iwo, neeznenu ibne anụ izi. Kwnornu nụ ọkwukwo nsọ kwuru,

“Chiokike nọogwuzogidne ele oknomokno,

kọvu o neenye ele zị wọhnerne n'ovu oru.”

⁶ Kam kpayarụ, anụ gwedna ẹhni anụ nụ mkpururu aka dikne ke Chiokike, o joovulizọ anụ olu n'ige ke a.

⁷ Anụ vukwnusi a kpakara mkpa anụ, kwnornu nụ nhne gbasiri anụ neemetụ a n'ovu.

⁸ Anya dụ anụ ẹli, anụ neese nse, nye irno anụ bụ Ekwensu, naagbagharị lele odum nọogbo ọgbugbo noopio nye o jeeri.

⁹ Anụ ziri kwem nụ ọkwnata ovu anụ, anụ gwuzogidne a, kwnornu nụ rụmu Nda anụ nụ kpakara ọwa naagawhe otu awhnụwhnu wam.

¹⁰ Nga anụ tarụ awhnụwhnu ige matị, Chiokike ke oru nye sukwuru anụ bna n'igwugwu a kwó okwo nụ Karaisi, joogwuzote anụ, nyee anụ rikne, gba anụ inwe.

¹¹ Kpakara rikne ọchichi bụ ke a ọkwnukokwnu. Amim.

Obekwu ipne-aznu

¹² Saịlasi nwene aị rukna ke kwesiri ọkwnata ovu yinnu m aka gba ọkwukwo izi matị ka, m naariasno anụ naagba akebe nụ ka bụ ezi oru Chiokike n'olu hne anụ gwuzo.

¹³ Ọgbako Chiokike ke zị nụ Babiloni,* ke be hohiakoru anụ nụ ya neebekwu anụ, ma Makị nnwọ m.

* **5:13** Ka bụ Rom

¹⁴ Anụ gweru ọwhnun'anya Karaịsi neebekwu
ibne anụ.

Udno dazịnu kpakara anụ ele zị nụ rime Karaịsi.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89